

**ИРГЭНИЙ БА АРИЛЖААНЫ ХЭРГИЙН ТАЛААР
ЭРХ ЗҮЙН БОЛОН ШҮҮХИЙН ТУСЛАЛЦАА ХАРИЛЦАН ҮЗҮҮЛЭХ ТУХАЙ
МОНГОЛ УЛС
БОЛОН
БҮГД НАЙРАМДАХ ХЯТАД АРД УЛСЫН
ЗАСАГ ЗАХИРГААНЫ ОНЦГОЙ БҮС МАКАО
ХООРООНДЫН ХЭЛЭЛЦЭР**

Монгол Улс болон Бүгд Найрамдах Хятаад Ард Улсын Төв Засгийн газраас энэхүү хэлэлцээрийг байгуулах бүрэн эрх авсан Бүгд Найрамдах Хятаад Ард Улсын Засаг захиргааны онцгой бүс Макао (цаашид "Засаг захиргааны онцгой бүс Макао" гэх) (цаашид "Талууд" гэх),

Иргэний ба арилжааны хэргийн талаар эрх зүйн болон шүүхийн туслалцаа харилцан үзүүлэх салбарын хамтын ажиллагааг чухалчлан үзэж,

Дараах зүйлийн талаар хэлэлцэн тохиролцов. Үүнд:

1 дүгээр зүйл

Эрх зүйн болон шүүхийн туслалцааны хамрах хүрээ

Талууд энэхүү хэлэлцээрийн дагуу иргэний болон арилжааны хэргийн талаар дараах эрх зүйн болон шүүхийн туслалцааг харилцан үзүүлнэ. Үүнд:

(a) шүүхийн болон шүүхийн бүс баримт бичиг гардуулах;

(b) нотлох баримт бүрдүүлэх;

(c) шүүхийн шийдвэрийг хүлээн зөвшөөрөх болон гүйцэтгэх. Үүнд шүүхээс гарч буй шийдвэр болон талуудын хуульд заасан адилтгах шийдвэр багтана;

(d) мэдээлэл солилцох.

2 дугаар зүйл

Эрх зүйн хамгаалалт

1. Монгол Улсын иргэн болон Засаг захиргааны онцгой бүс Макаогийн оршин суугч нь нөгөө талын хуулийн харьялалд тухайн талын иргэн эсхүл оршин суугчтай түүний дотоодын хуульд заасны дагуу байгуулагдсан хуулийн этгээдэд нэгэн адил хамгаалалт эдэлнэ.

2. Энэ зүйлийн 1 дэх заалт нь аль ч талын нутаг дэвсгэрт байрлах бөгөөд түүний дотоодын хуульд заасны дагуу байгуулагдсан хуулийн этгээдэд нэгэн адил хамаарна.

3 дугаар зүйл

Эрх бүхий төв байгууллага

1. Талууд энэхүү хэлэлцээрийн зорилгоор хоорондоо шууд харилцах болон хүсэлт гаргах, хүсэлт хүлээн авах эрх бүхий төв байгууллагыг томилно.

2. Монгол Улсын эрх бүхий төв байгууллага нь Улсын Дээд шүүх байна. Засаг захиргааны онцгой бүс Макаогийн эрх бүхий төв байгууллага нь Засаг захиргааны онцгой бүс Макаогийн Ерөнхий прокурорын газар байна.

3. Аль ч тал өөрийн эрх бүхий төв байгууллагыг өөрчилж болох бөгөөд уг өөрчлөлтийн талаар негеө талдаа нэн даруй бичгээр мэдэгдэнэ.

4 дүгээр зүйл

Туслалцаа хүссэн хүсэлтийн хэлбэр болон агуулга

1. Эрх зүйн болон шүүхийн туслалцаа хүссэн хүсэлт нь бичгээр үйлдэгдсэн байх бөгөөд дараах зүйлийг тусгасан байна. Үүнд:

- (a) хүсэлт гаргагч байгууллагын нэр;
- (b) хүсэлт хүлээн авагч байгууллагын нэр;
- (c) эрх зүйн болон шүүхийн туслалцааны хүсэлтэд заасан хэргийн мэдээлэл;
- (d) хүсэлтэд холбогдох этгээдийн хувийн мэдээлэл, иргэншил, оршин сууж буй газар, хуулийн этгээдийн хувьд нэр, хаяг;
- (e) хэрэв хүсэлтэд холбогдох этгээдийг төлөөлөх хүн байгаа бол түүний нэр болон хаяг;
- (f) хүсэлтийн агуулга болон түүнийг гүйцэтгэхэд шаардлагатай бусад мэдээлэл.

2. Эрх зүйн болон шүүхийн туслалцаа хүссэн хүсэлт, бусад дагалдах баримт бичиг болон мэдээллийг хүсэлт гаргагч талын албан ёсны хэлээр үйлдэж, хүсэлт хүлээн авагч талын албан ёсны хэл эсхүл англи хэл дээрх орчуулгыг хавсаргасан байна.

5 дугаар зүйл
Туслалцааны зардал

1. Талууд өөрсдийн нутаг дэвсгэр дээр эрх зүйн болон шүүхийн туслалцаа үзүүлэхтэй холбогдон гарах зардлыг тус тус хариуцна.

2. Дээр зааснаас үл хамааран хүсэлт гаргагч тал дараах зардлыг хариуцна.
Үүнд:

- (a) энэхүү хэлэлцээрийн 11 дүгээр зүйлд заасны дагуу хүсэлт гаргагч талын нутаг дэвсгэрт хүрэлцэн ирэх этгээдийн ирэх болон буцах замын зардал, нутаг дэвсгэрт байх үеийн зардал эсхүл олговор;
- (b) шинжээчид холбогдох зардал, төлбөр;
- (c) орчуулга болон тайлбарын зардал, төлбөр.

3.Хэрэв хүсэлтийг биелүүлэхэд онцгой шинж чанартай зардал шаардлагатай бол талууд тухайн хүсэлтийг биелүүлэх болзол, нөхцлийг тодорхойлоо ор харилцан зөвлөлдөнө.

4.Хэрэв хүсэлт хүлээн авагч тал хүсэлт гаргавал энэ зүйлийн 2 дахь хэсэгт заасан зардал, төлбөр эсхүл олговрыг хүсэлт гаргагч тал урьдчилан төлж болно.

**6 дугаар зүйл
Туслалцаа үзүүлэхээс татгалзах**

1.Хэрэв хүсэлтийг биелүүлэх нь Монгол Улсын хувьд бүрэн эрхт байдал, аюулгүй байдал, нийтийн дэг журам, эсхүл нийтийн бусад үндсэн эрх ашигт хохирол учруулахаар бол, эсхүл Бүгд Найрамдах Хятад Ард Улсын Засаг захирагааны онцгой бус Макаогийн бүрэн эрхт байдал, эсхүл Бүгд Найрамдах Хятад Ард Улс болон түүний аль нэг хэсгийн аюулгүй байдал, нийтийн дэг журам, эсхүл нийтийн бусад үндсэн эрх ашигт хохирол учруулахаар бол хүсэлт хүлээн авагч тал хүсэлтийг биелүүлэхээс татгалзаж болно.

2.Хүсэлтийг биелүүлэхээс татгалзсан тохиолдолд хүсэлт хүлээн авагч тал хүсэлт гаргагч талд хүсэлт болон холбогдох баримт бичгийг буцаан хүргүүлэх бөгөөд татгалзсан үндэслэлийг мэдэгдэнэ.

**7 дугаар зүйл
Шүүхийн болон шүүхийн бус баримт бичиг гардуулах**

1.Хүсэлт хүлээн авагч тал нь хүсэлт гаргагч талаас шилжүүлэн өгсөн аливаа баримт бичгийг өөрийн хууль тогтоомжид нийцүүлэн аль болох боломжит нөхцлийн дагуу гардуулах арга хэмжээг авна.

2.Гардуулах тухай хүсэлтэд хүлээн авах этгээдийн хаягийг тодорхой зааж, гардуулбал зохих баримт бичгийг хавсаргана.

3.Хүсэлт хүлээн авагч тал баримт бичиг гардуулан өгсний дараа гардуулсан огноо, газар болон гардуулсан хэлбэрийн талаар нотолгоог хүсэлт гаргагч талд хүргүүлэх бөгөөд энэ нь эрх бүхий байгууллагын гарын үсэг, тэмдэг болон баримт бичиг гардуулсан хүний гарын үсэгтэй байна. Гардуулах боломжгүй тохиолдолд энэ тухайгаа мэдэгдэнэ.

**8 дугаар зүйл
Нотлох баримт бүрдүүлэх**

1.Талууд хүсэлтийн дагуу харилцан бие биедээ нотлох баримт гаргаж өгөх бөгөөд хэргийн зохигчдоос мэдээлэл авах, гэрчийн мэдүүлэг авах, эд материалын болон бичгээр нотлох баримт цуглуулах, шинжээчийн дүгнэлт гаргуулах, шүүхийн үзлэг хийлгэх буюу нотлох баримт бүрдүүлэх зорилгоор шаардлагатай бусад арга хэмжээг авна.

2.Нотлох баримт бүрдүүлэх тухай хүсэлтэд энэ хэлэлцээрийн 4 дүгээр зүйлд зааснаас гадна дараах зүйлийг тодорхой тусгана. Үүнд:

- (а) талууд, гэрч, шинжээчээс асуух асуултын жагсаалт болон холбогдох хэргийн агуулга;

(b) үзлэг хийх эд зүйл, баримт бичиг болон бусад эд хөрөнгийн талаар тодорхойлолт;

(c) 12 дугаар зүйлийн (b) дэд хэсэгт заасан шаардлагатай бусад мэдээлэл.

3. Энэхүү хэлэлцээр нь дараах асуудалд хамаарахгүй. Үүнд:

(a) тухайн хэргийг хянан шийдвэрлэх ажиллагаанд ашиглахаас өөр зорилгоор нотлох баримт бүрдүүлэх; эсхүл

(b) тухайн хэрэгтэй шууд холбоогүй, уялдаагүй баримт бичиг цуглуулах.

9 дүгээр зүйл

Баримт бичиг гардуулах, нотлох баримт бүрдүүлэх туслалцаа үзүүлэхээс татгалзаж болохгүй үндэслэл

Хүсэлт хүлээн авагч тал нь түүний шүүх тухайн хэрэг хянан шийдвэрлэх ажиллагааны хувьд онцгой харьялал эдэлдэг, эсхүл ирүүлсэн хүсэлтэд холбогдох ажиллагааг гүйцэтгэхийг түүний дотоодын хуульд заасны дагуу зөвшөөрдөггүй гэсэн үндэслэлээр хүсэлтийг хүлээн авахаас татгалзаж болохгүй.

10 дугаар зүйл

Баримт бичиг гардуулах, нотлох баримт бүрдүүлэх туслалцааны хүсэлтийг биелүүлэх

1. Баримт бичиг гардуулах, нотлох баримт бүрдүүлэх хүсэлтийг биелүүлэхдээ хүсэлт хүлээн авагч тал өөрийн хуулийг хэрэглэнэ. Гэхдээ хүсэлт хүлээн авагч тал өөрийн хууль тогтоомжид харшлахгүй гэж үзсэн тохиолдолд хүсэлтийг биелүүлэхдээ хүсэлт гаргагч талын санал болгосон аргыг хэрэглэж болно.

2. Хүсэлт гаргагч талын хүсэлтийн дагуу хүсэлт хүлээн авагч тал нь хүсэлт гаргагч тал болон сонирхогч тал, тэдгээрийн төлөөлөгчдөд хүсэлтийг биелүүлэх өдөр, газар болон тэдгээрийн оролцооны талаар мэдэгдэнэ.

3. Хүсэлт хүлээн авагч тал хүсэлтийг биелүүлсний дараа түүний үр дүнгийн талаар мэдэгдэж, холбогдох бүх баримт бичиг болон олж авсан нотлох баримтыг хүсэлт гаргагч талд хүргүүлнэ.

4. Хүсэлт хүлээн авагч тал хүсэлт гаргагч талаас ирүүлсэн мэдээлэл нь тухайн хүсэлтийг биелүүлэхэд хангалттай бус, эсхүл тодорхой бус гэж үзвэл хүсэлт гаргагч талаас нэмэлт мэдээлэл хүсэж болно, хаяг тодорхой бус тохиолдолд хаягийг зөв тогтоох талаар зохих арга хэмжээ авна.

5. Энэ зүйлийн 4-т зааснаас бусад шалтгаанаар хүсэлтийг биелүүлэх боломжгүйд хүрвэл түүнийг биелүүлэхэд саад олж буй учир шалтгааныг мэдэгдэж, хүсэлт гаргагч талаас ирүүлсэн баримт бичгийг хүсэлтийн хамт хүсэлт гаргагч талд буцаан хүргүүлнэ.

11 дүгээр зүйл

Гэрч, шинжээчийг байлцуулах болон хамгаалах

1.Хүсэлт хүлээн авагч талын нутаг дэвсгэрт буй гэрч болон шинжээч нь хүсэлт гаргагч талын шүүхэд очих үүрэг хүлээхгүй.

2.Хэрэв хүсэлт гаргагч тал хүсэлт хүлээн авагч талын нутаг дэвсгэрт буй гэрч болон шинжээчийг шүүхэд өөрийн биеэр хүрэлцэн ирэх нь чухал ач холбогдолтой гэж үзвэл, зарлан дуудах хуудас гардуулах тухай хүсэлтийг товлосон хугацаанаас 60 хоногийн өмнө хүсэлт хүлээн авагч талд хүргүүлнэ, мөн яаралтай тохиолдолд хүсэлт хүлээн авагч тал зөвшөөрвэл үүнээс бага хугацаанд хүргүүлнэ.

3.Хүсэлт хүлээн авагч тал хүсэлт гаргагч талд гэрч, шинжээчийн талаар хариу мэдээллийг нэн даруй мэдээлнэ.

4.Дуудагдсан этгээд хүрэлцэн ирээгүй тохиолдолд түүнд ял, шийтгэл оногдуулахгүй.

5.Хүсэлт гаргагч талын эрх бүхий байгууллагад сайн дураар хүрэлцэн ирсэн гэрч, шинжээчийг хүсэлт гаргагч талын нутаг дэвсгэрт ирэхээс өмнө үйлдсэн үйлдэл, эс үйлдэлд эрүүгийн хариуцлагад татах, цагдан хорих, ял шийтгэх буюу эрх чөлөөг нь ямар нэг хэлбэрээр хязгаарлаж болохгүй, түүнчлэн хүсэлт хүлээн авагч тал болон тухайн хүний зөвшөөрелгүй аливаа бусад хэрэг хянан шийдвэрлэх ажиллагаанд нотлох баримт өгөх үүрэг хүлээхгүй.

6.Гэрч, шинжээч нь цаашид байх шаардлагагүй гэж зохих эрх бүхий байгууллагаас мэдэгдсэнээс хойш хүсэлт гаргагч талын нутаг дэвсгэрээс 15 өдрийн дотор гарч яваагүй бол энэ зүйлийн 5-д заасан хамгаалалт дуусгавар болно. Энэхүү хугацаанд гэрч, шинжээч нь хүсэлт гаргагч талын нутаг дэвсгэрээс өөрөөс нь үл хамаарах шалтгааны улмаас гарч явж чадаагүй хугацааг оруулж тооцохгүй.

7.Энэ зүйлийн 2-т заасан хүсэлтэд гэрч, шинжээчид олгох зардал болон урамшууллын талаарх мэдээллийг тусгана. Гэрч, шинжээч нь энэ хэлэлцээрийн 5 дугаар зүйлийн 4-т заасан зорилгоор холбогдох зардал болон урамшууллыг урьдчилан авах хүсэлтэй байгаагаа хүлээн авагч талд мэдэгдэж болно.

12 дугаар зүйл Нотлох баримт гаргаж өгөхөөс татгалзах

1.Энэхүү хэлэлцээрийн дагуу нотлох баримт гаргаж өгөх этгээд нотлох баримт гаргаж өгөхөөс татгалзах давуу эрх, үүрэгтэй бол дараах тохиолдолд тухайн нотлох баримтыг гаргаж өгөхөөс татгалзаж болно. Үүнд:

- (a) хүсэлт хүлээн авагч талын хуульд заасны дагуу; эсхүл
- (b) хүсэлт гаргагч талын хуульд заасны дагуу тухайн хүсэлтэд тэрхүү давуу эрх, үүргийг тодорхой заасан, эсхүл хүсэлт хүлээн авагч талын эрх бүхий төв байгууллагаас тэрхүү давуу эрх, үүргийг хүсэлт гаргагч талын эрх бүхий төв байгууллагад зөвшөөрсөн бол.

13 дугаар зүйл Шүүхийн шийдвэрийг хүлээн зөвшөөрөх болон гүйцэтгэх

Энэхүү хэлэлцээрт заасан нөхцөлийн дагуу аль ч тал нөгөө талын иргэний болон арилжааны хэргийн талаар гаргасан шүүхийн шийдвэр болон эрүүгийн

хэргийн иргэний нэхэмжлэлтэй холбоотой шүүхийн шийдвэрийг өөрийн нутаг дэвсгэрт хүлээн зөвшөөрч гүйцэтгэнэ.

14 дүгээр зүйл

Шүүхийн шийдвэрийг хүлээн зөвшөөрөх болон гүйцэтгэх тухай хүсэлт

Шүүхийн шийдвэрийг хүлээн зөвшөөрөх болон гүйцэтгэх тухай хүсэлтэд дараах баримт бичиг дагалдана. Үүнд:

- (a) шүүхийн шийдвэрийн баталгаат хуулбар, шүүхийн шийдвэрт түүний хүчин төгөлдөр болсон тухай мэдээлэл тусгагдаагүй бол уг шүүхийн шийдвэрийн хүчин төгөлдөр болсныг нотолсон баримт бичиг;
- (b) шүүхийн шийдвэрт өөрөөр заагаагүй бол шүүх хуралд оролцоогүй шүүгдэгчийг хүсэлт гаргагч талын хуульд заасны дагуу зарлан дуудсан болохыг нотлох баримт;
- (c) шүүхийн шийдвэрт тодорхой заагаагүй бол эрх зүйн чадамжгүй этгээдийн хууль ёсны төлөөвлөгчийг нотолсон баримт бичиг.

15 дугаар зүйл

Шүүхийн шийдвэрийг хүлээн зөвшөөрөх болон биелүүлэхээс татгалзах

Дараах тохиолдолд шүүхийн шийдвэрийг хүлээн зөвшөөрөх болон биелүүлэхээс татгалзаж болно. Үүнд:

- (a) хүсэлт хүлээн авагч талын хуульд заасны дагуу тухайн хэргийг харьялахгүй шүүхээс шийдвэр гаргасан бол;
- (b) хүсэлт хүлээн авагч талын шүүхээс эцсийн шийдвэр гарсан, эсхүл гуравдагч талын шүүхээс адил оролцогчтой адил хэрэгт эцсийн шийдвэр гарсныг хүлээн зөвшөөрсөн бол;
- (c) адил оролцогчтой адил хэрэгт хүсэлт хүлээн авагч тал хэрэг хянан шийдвэрлэх ажиллагаа явуулж байгаа бөгөөд энэхүү хэрэг хянан шийдвэрлэх ажиллагаа нь түрүүлж эхэлсэн бол.

16 дугаар зүйл

Шүүхийн шийдвэрийг хүлээн зөвшөөрөх болон гүйцэтгэх журам

1. Шүүхийн шийдвэрийг хүлээн зөвшөөрөх болон гүйцэтгэх ажиллагааг хүсэлт хүлээн авагч талын шүүх өөрийн улсын хууль заасны дагуу гүйцэтгэнэ.

2. Хүсэлт хүлээн авагч талын шүүх тухайн шүүхийн шийдвэрийн үндэслэлийг хянахгүй бөгөөд зөвхөн түүнийг энэхүү хэлэлцээрийн заалтад нийцэж байгаа эсэхийг нягтална.

3. Хэрэв шүүхийн шийдвэрт хэд хэдэн асуудлыг гүйцэтгүүлэхээр заасан бөгөөд бүхэлд нь гүйцэтгэх боломжгүй тохиолдолд хүсэлт хүлээн авагч тал хэсэгчлэн гүйцэтгэж болно.

17 дугаар зүйл

Арбитрын шийдвэрийг хүлээн зөвшөөрөх болон гүйцэтгэх

Талууд 1958 оны 6 дугаар сарын 10-ны өдөр Нью-Йорк хотноо Нэгдсэн Үндэстний Байгууллагын Ерөнхий Ассамблейгаас баталсан Гадаадын арбитрын шийдвэрийг хүлээн зөвшөөрөх, биелүүлэх тухай конвенцын дагуу негеэ талын хуулийн харьяалалд гаргасан арбитрын шийдвэрийг хүлээн зөвшөөрч гүйцэтгэнэ.

18 дугаар зүйл

Мэдээлэл солилцох

Талууд негеэ талын хүсэлтийн дагуу өөрсдийн нутаг дэвсгэрт дагаж мөрдөгдөж буй хууль тогтоомж түүнчлэн эрх зүйн болон шүүхийн туршлагын талаар харилцан мэдээлж байна.

19 дүгээр зүйл

Баримт бичгийг хүлээн зөвшөөрөх

Энэхүү хэлэлцээрийн зорилгоор аль ч талын шүүх болон бусад эрх бүхий байгууллагаас үйлдсэн албан ёсны тамга, тэмдэг, эрх бүхий этгээдийн гарын үсэгтэй баримт бичгийг негеэ талын нутаг дэвсгэрт ямар нэг нотолгоогүйгээр хүлээн зөвшөөрнө.

20 дугаар зүйл

Зөвлөлдөх

Энэхүү хэлэлцээрийг тайлбарлах, хэрэглэх болон хэрэгжүүлэхтэй холбогдон гарсан аливаа маргааныг талуудын эрх бүхий төв байгууллага хоорондоо зөвлөлдөх замаар шийдвэрлэнэ. Эрх бүхий төв байгууллагууд зөвшилцэлд хүрч шийдвэрлэх боломжгүй тохиолдолд маргааныг дипломат шугамаар шийдвэрлэнэ.

21 дүгээр зүйл

Хүчин төгөлдөр болох, нэмэлт, өөрчлөлт оруулах болон цуцлах

1. Энэхүү хэлэлцээр нь талууд хэлэлцээрийг хүчин төгөлдөр болгоход тавигддаг дотоодын шаардлагаа биелүүлж дууссан тухайгаа бичгээр мэдэгдсэн сүүлчийн өдрөөс хойш гуч (30) хоногийн дараа хүчин төгөлдөр болно.

2. Талууд харилцан бичгээр тохиролцсоноор энэхүү хэлэлцээрт нэмэлт, өөрчлөлт оруулж болно. Тус нэмэлт, өөрчлөлт нь энэ зүйлийн 1 дэх хэсэгт заасны дагуу хүчин төгөлдөр болно.

3. Энэхүү хэлэлцээрийн заалт нь тус хэлэлцээр хүчин төгөлдөр болсноос хойш гаргасан аливаа хүсэлтэд үйлчлэх бөгөөд тус хэлэлцээр хүчин төгөлдөр болохоос өмнө хийгдсэн үйлдэлд холбогдуулан тус хэлэлцээр хүчин төгөлдөр болсноос хойш гаргасан хүсэлтэд мөн адил үйлчилнэ.

4. Энэхүү хэлэлцээр нь тодорхойгүй хугацаагаар хүчин төгөлдөр байна. Аль ч тал хэдийд ч энэхүү хэлэлцээрийг цуцлах хүсэлтээ негеэ талдаа бичгээр мэдэгдэж болно. Энэ тохиолдолд мэдэгдэл өгсөн өдрөөс хойш нэг зуун ная (180) хоногийн дараа тус хэлэлцээр хүчингүй болно.

5. Энэхүү хэлэлцээр дуусгавар болсон хэдий ч түүнийг дуусгавар болохоос эмнэ хүлээн авсан эрх зүйн туслалцаа хүссэн хүсэлтийг тус хэлэлцээрт заасны дагуу эцэслэн шийдвэрлэж дуустал үргэлжлүүлэн гүйцэтгэнэ.

ДЭЭР ДУРДСАНЫГ НОТОЛЖ, тус тусын Засгийн газраас зохих ёсоор эрх олгогдсоны дагуу энэхүү хэлэлцээрт гарын үсэг зурав.

Энэхүү хэлэлцээрийг ... хотноо 20...оны ... дугаар сарын ...-ны өдөр Монгол, хятад, англи хэлээр тус бүр хоёр эх хувь үйлдсэн бөгөөд эх бичвэрүүд адил хүчинтэй байна. Хэлэлцээрийг тайлбарлахад зөрүү гарвал англи хэл дээрх эх бичвэрийг баримтална.

МОНГОЛ УЛСЫГ ТӨЛӨӨЛЖ

**БҮГД НАЙРАМДАХ ХЯТАД АРД
УЛСЫН ЗАСАГ ЗАХИРГААНЫ
ОНЦГОЙ БУС МАКАОГ ТӨЛӨӨЛЖ**